

# AR BARIZIANEZ

---

WAR DON : *Ar Pilhaouer.*

En hon Bro Breiz eman ar c'hiz  
 Gant eur rumm merc'hed yaouank  
 Da vonet hirie da Bariz,  
 Da glask madou, bue frank ;  
 C'hoant o deus da vezan matez  
 Dindan an holl er c'herio.

DISKAN

*Foei, foei, foei, d'ar Barizianez  
 A ra mez da dud he Bro !*

Gonid bara en Breiz-Izel  
 Ar plac'h yaouank na c'houll ken ;  
 En he fenn a zo deut avel :  
 — « Tro, emei, d'ar skubelen ! » —  
 Setu hi o tec'hel hep mez  
 Pell diouz he zud en daëro...

*Foei, foei, foei, d'ar Barizianez  
 A ra mez da dud he Bro.*

Ma c'houllfe an dud diganti  
Pelec'h ec'h a ken diskwiz,  
Hi a larfe, hep he fedi :  
— « Me ac'h a da Ba-a-riz ! » —  
Ha neuze d'ar c'henaouegez  
Pep den, dre fent, a laro :

*Foei, foei, foei, d'ar Barizianez  
A ra mez da dud he Bro !*

Pa vo pellaet diouz he Breiz  
Hag en Pariz dizanve,  
Al labouriou kaled, direiz,  
Eviti a vo mad tre ;  
Evel eul loen 'hed he devez,  
Hep paouez hi a boanio . . .

*Foei, foei, foei, d'ar Barizianez  
A ra mez da dud he Bro !*

Koll a rey ebarz ar gêr vras  
He zammig nerz, he yec'hed,  
Ha pez eo ar gwasan, siouaz !  
He furnez ha he gened ;  
Ne viro eus ar Vretonez  
Netra nemet an hano !

*Foei, foei, foei, d'ar Barizianez  
A ra mez da dud he Bro !*

Ma tigoue d'ezi dont en-dro,  
Goude vo bet en Pariz,  
Neuze e vo eur plac'h faro,  
Eun dimezel eus ar c'hiz ;

Gwisket 'vo 'vel eur rouanez,  
'Vo ken anveet 'n he bro !

*Foei, foei, foei, d'ar Barizianez*  
*A ra mez da dud he Bro !*

War he fenn, evel eur sparfel,  
'Vo gwintet eun tok re vras,  
Ma laro outan an avel :  
— « Heman zo prest da vont c'hoaz! .. » —  
Leun 'vo ar plac'h a lorc'h, a c'houez  
Eus lein he fenn d'e boto !

*Foei, foei, foei, d'ar Barizianez*  
*A ra mez da dud he Bro !*

Dilezet 'vo ar brezoneg,  
Ankouaet e vo ganti ;  
Distaga a rey en gallek :  
— « Oh ! lê, lê, j'viens d' Pêris ! » —  
Eur vez 'vo gwelet ar plac'h kez,  
Gand he stumm hag hec'h ardo...

*Foei, foei, foei, d'ar Barizianez*  
*A ra mez da dud he Bro !*

Da bep tra ebarz Breiz-Izel  
Hi a gavo e dam zi,  
N'he devo ouz bro he c'havel  
Nemet droug ha kasoni ;  
Er gêr hi a vezo diez,  
Red vo d'ei mont c'hoaz en-dro !

*Foei, foei, foei, d'ar Barizianez*  
*A ra mez da dud he Bro !*

Ar plac'h nan eo ken Bretonnez,  
Rag he bro he deus nac'het,  
Bezan eo eur **Barizianez** !!  
Ha piou an ije sonjet ?...  
— Youc'homp holl eta en eur vouez  
Warni a-bouez hon fenno :

*Foei, foei, foei, d'ar Barizianez  
A ra mez da dud he Bro !*

AR YEODET.

( A. Bocher )

